



NAUPANG LABU HAWNNA



THEMBASUK PASTOR BIAL HAWNNA



KOCHUAM UPA SEMINAR - LAMKA SOUTH PRESBYTERY

To,

If undelivered please return to - TPC Office,
P.O. Box - 107
D. Phailian,
Churachandpur - 795128
Manipur, India



HINNA VÂK HUNG KIPAT DAN

- I Chung un Lalpa a phai
- Tangphai Kochuam leh Halthakna
- Thianthona hi Pathian Batna a hi

Editor : Rev. Kamkhotinthang Neihsial,
Executive Secretary

Joint Editors : Rev. C. Lalremruata, Consultant
: Rev. Luttinlel
: Rev. Khaisonthang Vaiphei
: Upa Thualkholian
: Upa Nengsuanthang
: Pi Hawipakkim, Secretary, CKNP
: Tv. Lianmuanthang, Secretary, CKKP

Business Manager : Tual Upa, Langlalthamuan
TPC Office D. Phailian
P.O. Box 107 CCPur-795128 Manipur
Phone No. +91 9958160325
Email - ehinnavak@gmail.com

Kum khat lak man : Rs. 150.00

A man pia nuam leh a la thak nuam ten Business Manager kianga hiatsak ding.

A SUNGAH THU UMTE

1. EDITORIAL	01
2. KOCHUAM HUANG	02
3. HINNA VÂK HUNG KIPATDAN	04
4. I CHUNG UN LALPA A PHAI	08
5. TANGPHAI KOCHUAM LEH HALTHAKNA	12
6. THIANTHONA HI PATHIAN BATNA A HI	15
7. LALPA DAWIGUAL IN I BAWL NAU EM?	21
8. DAWTNA LEH DAWNUNA	25
9. THEMBASUK PASTOR BIAL HAWN REPORT	33
10. KNP HUANG	36
11. SUNNA	39

SYNOD PUIPATE

Moderator : Rev. Vanlalchhuanga
Secretaries : Rev. Andrew LR Khiangte (Sr.)
: Rev. Summinlian (Jr.)
Finance Officer : Upa Tinliankham
Statistician : Rev. Thianganlim
Executive Secretary : Rev. Kamkhotinthang Neihsial
Consultant : Rev. C. Lalremruata

Hinna Vâk ah thu kisua zosia hi Editor ngaidan a hi suak puai



Pauchapna Thupi:

1. Kochuam Upa leh Tual Upa te'n Kochuam mite Taksa leh Thagau ah kiningting tak mai ah a puihuai jel theina ding un pauchap hitiu.
2. Khristian Khanglai Pawl leh Kochuam Numei Pawl (Central, Bial, Branch) te nasepna a lawting zel theina ding in pauchap hitiu.
3. Missionary mun chuam chuam ah um te â ding in leh Semtu chawm Kochuamte leh mimal â ding in pauchap hitiu.
4. Gamsung buaina ziak ah panlatu pawl chuam chuam ah puitute a ding in pauchap hitiu.

I CHUNG UN LALPA A PHA'I

Hinna Vâk Simtu Dawitakte haw **Hinna Vâk** kum 17 tiang mêl mu thei ding ah ei puitu Pathian min in Chibai ka hun bûk hi.

Kum 17 tinna **Hinna Vâk** hin Editorial Board masate ah kipat leh mi chuam chuam ah kipat thu hawi tak tak sim thei ding in i um kit tau a, lungdam a um tak zet hi.

Kum 17 tiang mel mu thei ding ah ei puitu Pathian chung leh **Hinna Vâk** Board leh Editorial masate chung in le kipak thu i gen ui. **Hinna Vâk** hi i kochuam chanchin khiattwana leh Chanchinpha nasepna ding ah matchak pawimaw tak khat a hi ti hemil pua'tiu. Kum 17 tiang mel mu ta maleu hin **Hinna Vâk** latu hi duthusam i ting zo nai puau. Kochuam Inkuan zat 3,650 i hi lai un subscriber hi 1,475 bep i hi nalai ui. Kochuam mal ah subscriber tampen chu 100 a hia, a tawmpen chu 1 bep a hi. Pan la thak hitiu. A neitu chiat ah kingâi in **Hinna Vâk** masawnna ding in theitawp sua zing hitiu in, thu zik leh sermon-te haw le kipadam lo kei in pe zing hitiu.

Hinna Vâk masawnna ding in theitawp sua a hi zing hi. Nilai Zan Bu ah Nibîk Programme ah thupi kipe zosiate tawh kituak in Sermon hung kikawi zêl di a hi tai ti tepte leu hin. **Hinna Vâk** kingakna, hâtna leh masawnna chu midang hilo in 'keima ka hi' ti thei chiat leu hin nawp a um hi!

Lalpa'n simtute zosia malzawl chiat ta hen!



Kochuam Huang

Pastor Bial KNP Kikhawmpi neizaw thu

Pastor Bial KNP Kikhawmpi chu bangma buaina umlo in Pastor Bial tin te'n Taksa leh Thagau ah lawting tak in Biakna Kikhawp, Vaihawmna, Kitelna leh Fellowship te'n matzaw a hi.

Revival Speaker lak thu

Kum 2025 sung â ding ah Tangphai Presbyterian Kochuam Revival Speaker ding in a nuai ah mi pali (4) te hi lâk a hui- (Revival Committee 5:3 dt. 3.2.2025)

1. Pu Kamzathang,
Gangpimual Kochuam
2. Tv. ST Satboi,
Centenary Kochuam
3. Tv. M. Sasang,
Centenary Kochuam
4. Tv. Duhlian Pauthianmang,
Hill-Town Kochuam

Lâk ah um Revival Speaker te'n 14-20 March 2025 sung in Tanggam Presbytery sung ah Pastor Bial chuam chuam ah a nuai ah gual hin vaiguan nei di a hui.

Pu Kamzathang *D. Khawzim*
Tv. ST Satboi *Munpi*

Tv. M. Sasang *Kawlhen*
Tv. Duhlian Pauthianmang
Leijangphai

S. Kawtlian Kochuam Kum 50 tinna

S. Kawtlian Kochuam Kum 50 tinna Golden Jubilee chu Pathian mapuina zal in Ni 2 February 2025 (Pathianni) in a lawm ui. Zia hun a hin Jubilee Suang hawanna Rev. C. Lalremruata, Consultant in a nei a, Thugenna Rev. K. Neihzial, Executive Secretary in nei in, Souvenir hawanna Rev. Khaisonthang Vaiphei, Bialtu Pastor in a nei hi. Synod Choir, S. Kawtlian Pastor Bial Lapawl leh S. Kawtlian Kochuam Lapawl te'n Pathian pakna Lâ a sa thei ui. Programme lawting tak ah mat a hi zaw nung in Nitaklam Ankuang um khawmna a um hi.

Naupang Labu

Tangphai Presbyterian Church Provisional Synod Literature & Publication Board guanggalna Naupang Labu kisiamzo chu a ni 3 February 2025 (Seppatni) in Synod Office (Thangkai-Lungpau Hall) ah Rev. C. Lalremruata, Consultant in Hawndawna a nei a, Upa G.T. Zuana in Latna Pauchapna a nei hi. (SL&PB 11:4 dt. 28.1.2025)

HINNA VÂK

Naupang Labu hi Tangphai
Synod Office ah ₹100/- man
ah chawk thei zing a hi.

Naupang Labu mat didan tangpi

- 1) Naupang Sunday School ah
- 2) Naupang/ Khangdawng
sûnnung kikhawp
- 3) Naupang Sunday School
Kikhawmpi
- 4) NPSS Kikhawmpi Kidemna

Kochuam Upa Seminar

Lamka South Presbytery
Kikhawmpi 13-veina in a
thupuk, Lamka South huapsung
ah Kochuam Upa Seminar/
Training chu Ni 21 February
2025 (Simhaini) in New Lamka
Kochuam Biak In ah mat a hi.
Seminar a hin Kochuam chuam
chuam ah kipat Kochuam Upa
79 a pang thei ui.

Seminar Paper pathum (3)
ah khen in Resource Person
te'n hun a matzaw taku leh
genkhawm hun mat sek a hi.

Seminar Paper te leh Resource
Person-te:

- 1) Pulpit ah thugen dan
Rev. S. Lama Vaiphei
- 2) Synod ziklo dante
Rev. Thanglianlal
- 3) Sel leh Sang
Rev. Lalpiaklian

Thembasuk Pastor Bial hawwna

Synod Kikhawmpi 3:11 leh OM
37:5 dt. 9.1.2025 dungzui in
22 February 2025 (Kiginni) in
Thembasuk Pastor Bial thak
hawwna Rev. Vanlalchhuanga,
Moderator in a nei hi. Bial
thak hawn a hi zaw in Special
Bial Kikhawmpi nei zawm a hi.
Pillangkata Kochuam enkawltu
Rev. S. Mangminthang chu
Thembasuk Pastor Bial
enkawltu ding in Ni 23
February 2025 (Pathianni)
in Rev. Kamkhotinthang
Neihisial, Executive Secretary in
kawidetna a nei hi.

KNP Kikhawmpi Lian leh KKP Vaihawm Kikhawp

28 Feb. - 2 March 2025 sung hi
KNP Kikhawp Lian 14-veina hun
hiding a hita, Mata Pastor Bial
zintunna Lingsiphai Kochuam
ah mat hiding a hi. Chuleh,
7-9 March 2025 sung hi KKP
Vaihawm Kikhawp 8-veina,
Panglian Pastor Bial zintunna
Panglian Kochuam ah mat hi di
a hi. Kochuam Numei Pawl-te
leh Khristian Khanglai Pawl te'n
Pathian mapuina leh Pawlna
chang ah Kikhawmpi nuam leh
navak tak ah a mat theina ding
un Kochuamte'n pauchapna'n
delzui chiat hitui.

HINNA VÂK HUNG KIPATDAN

~ Rev. T. Zuanlal
New Lamka (G)

Chanchinbu dawitak HINNA VÂK Editorpu'n dawisaktak leh ngainatak ah a chung ah thupi hi zik ding ah ei hun chialna zâl in a nuai ah gual ah hin holimna nei hitiu.

Khawvel ah Chanchinpha phuanlatna ding ah matchâk pawimaw leh gasua ma ma khat chu lekha pêk ah Chanchinpha genna (*Literature Evangelism*) hi a hi. Ei Kochuam/ Khawmpi'n le Chanchinpha hilna leh genna leh Kikhawmpi thu leh La kithuhiatna leh phuanna matchak i nei chuh Hinna Vâk hi a hi.

1. Hinna Vak hung kipatdan (piandaw dan): Hinna Vak hung kipatdaw dan chu hiti gual hi a hi. Khawmpi hi Manipur Christian Organization (NEIG Mission) ah umlai in Muanna Aksi Chanchinbu hi a la kisuapan hi. A lim ah chun Khanglaite'n (YCO) a la suau a, Khanglai â ding ah thil haksâ a hi phat in Khawmpi'n mawpuakna a la ta a hi. Zia kipat chun Khawmpi'n mawpuakna la

in, Khawmpi ah Executive Secretary mawpuakna tupen pen chu Editor le a hi ngal ta a hi. Hun a hung chiazal ah MCO chuh EOC in minsak a hung hita, Muanna Aksi le sua zawm zel a hi. Ahin, EOC Khawmpi'n Mizoram Synod zawp ding ti a hi phat in EOC chuh EOC (P) leh EOC (ECCI) in a hung kikhen ta a hi. Zia kikhenna kinawptuana (*Document of Agreement*

HINNA VÂK

dated 23.1.2008) dungzui in Muanna Aksi chuh EOC (ECCI) lamte chanvolak in a pang ta a hi. Kinawptuana piting a um masia kha Muanna Aksi chuh EOC (P) in a la sua ahia, chutia ECCI lam in a sua dingua a um phat ah chun EOC (P) a ding in haksatna a um ngal ta a hi. A zia chu Muanna Aksi latute kha Khawmpi mi leh sa bep hilo midang, Kochuam dang ah mi le ahia a. Chanchinbu (Muanna Aksi) latute piak zawmlo le thil lemchanglo ding a hi ti muthei ah a um ta. Chutichun hotute chukhawm in, Khawmpi'n Chanchinbu khat i neilo a hi chun i khawmpi mi leh sa leh midangte kiang ah Chanchinpha genna ding leh kithu hiattuana ding umlo ding a hi tâk zia in Chanchinbu sua ding in phasak a hita, zia thu chuh Rev. K. Lalhmuchhuaka, Administrative Secretary MPCs, Manipur Area kiang in tut ahia, Ama'n

lem ei sakpina zal in Chanchinbu sua ding in a kiumta. A chanchinbu min ding ah chun HINNA VÂK (*Life of Light*) ti ding in pha sak chiat a hi. Editor ding in Rev. T. Zuanlal (Former Muanna Aksi Editor) guat ngal a hi. Hinna Vâk Presbyterian Church of India (Logo in a chuang in) thupi kha a hi. Ei haw Chanchinbu tawh le a kituak a hi.

- 2. A tup leh a dawî:** Hinna Vâk Chanchinbu hin a tup leh a dawî chu chawmkimcha gen lehin simtute kiang ah Chanchinpha tut, puakpiak leh Khawmpi Pathian zala masawanna Kochuam mite kiang ah hiatsak chu a hi.

Chanchinbu hi lekha pêk ah Chanchinpha nasepna bâk pawimaw tak khat a hi. Chanchinbu simna pat in masawanna leh navakna thupi tak a um a hi. Lekhabu a hilo leh Lekhasua hin khawitak mun inle lut mawna a

nei puai. Hinna Vâk hin Pathian thu hinna thupha mite'n a pawm ua, a hinpi ding uh chu Hinna Vâk suatute tuppipen a hi, Hinna Vâk hi Chanchinpha gentute tunphaklona leh chia manlona mun ah Chanchinpha gentu a hilo leh hiltu a hi. Zialo a chun Thagau leh Taksa kizilsakna leh Kochuam gindan diklo lak ah venna le a hi tho hi. Zialo a chun i Chanchinbu in a daw chu a hileh i Khawmpi mi leh sa te'n khawmpi thu leh La, Khawmpi Lalpa zal ah masawnnate, Pauchapna thupite hiatsak le ahia, simtu zosia Khrista hiatna leh hepina a hung khanlet ding uh chu a dawipen a hi (cf. II Pet. 3:18)

3. Lawkpina/Phatchuampina:

Hinna Vâk Chanchinbu neucha hi Kum 17 vel i sua thei tau ah, Lalpa hepina zal in kal i suan zel ua, Lalpa chu pâk in um hen! Hinna Vâk hi simtute hin banggual in i lawkpi

a hiloleh i phatchuampi diam uh aw, ti hi suatute hiat nawp mama khat chu hi ding in a ginchat um hi.

Hinna Vâk Chanchinbu hin Jesu Hinna bulpi a hina leh mitin salvaktu eimusaktu leh Thagau ah An ah mangtu â ding in a phachuam in a lawkpi mamau a hi. Chanchinbu simtute chun midang a la hekha ngailo, a la simkha ngailote kiang ah i gensawinna zal un midang inle a phatchuampi in malzawlina a dawnphau a hi. Zialo a chun Hinna Vâk i simnau ah kipat Pathian thu hiatnate kibelp ah na vak leh hiatthiamna i nei ua chun zia chu lawkna diktak i mu chu a hi.

4. Mathîlna leh panlâk didan:

Hinna Vâk Chanchinbu hi tu sang ah a masawn zawk diakna ding in tamlo cha kikumkhawm hitiu.

a) *Pauchapna*: Hinna Vâk hi simtute â ding ah

HINNA VÂK

Pathian malzawl na a hina ding in Editor leh a seppite, Article (thusua) ziktute haw a ding in Pauchap tam hitiu. Suatute'n hikhial leh bawlkhial umlo ah pha tak ah a sua zing theina ding un, chuleh thusua hi Pathian in a malzawl na ding in.

Simtute â ding ah Thagau lam, lungthim lam leh Taksa khawsakna tiang ah le Puitu leh kaihuaitu a hitheina ding in Pauchap hitiu.

b) Midangte â ding malzawl na hi sak di:
Hinna Vâk hi eima Kochuam mi leh sa hikhellote hawnle a hun ngainatua, Pathian thu tak a hiat khawlaw theina ding un.

Thukhakna: Hinna Vâk Chanchinbu hi i Lalpa Jesu hina taklatna ahia, Ama a neitu chuh a hi. Ama mihingte hinna leh vakna petu a hi (Johan 1:4). Ei haw simtute Pathian malzawl na dawngtute hi midang â ding ah hing ding in kipethak hitiu. I bulpiteu Mizoram Synod nuai ah a la suau, RAMTHAR Chanchinbu kha Kochuam ah Numei Pawlte leh mipite chun midang a la zolote a lak piak ua, copy tam deu deu tuma khanle Lamka i Office a hin a hung tung sek a hi. Mi tamtak in a thawn in a muu a hi. Zia chu mi kipezote ziak a hi. Ei hawnle Lalpa min in midang kua a h'em khat i sep gimnau zalzo leh nawp a um hi. Lalpa'n simtu malzawl in umpi ta hen.

(Zia thu ziktu hi Editor masapen a hi)

I CHUNG UN LALPA A PHAI

~ Rev. S. Khaikholam
i/c Sumtukphai Pastor Bial

I chung ua Lalpa phatdan gendi leh gen didan tampitak a um a, tuchung a hin i hotute dawina gual in Mizoram Synod i zawp ua kipat tuhun tiang ah i chung ua Lalpa phatdan lam en ah holim ding i hiu.

Gambuai zia ah haksatna leh vangsiatnate zia ah Mizoram Synod va zawpkha himaleuhin kipak um tak leh vangphat um tak in cha tak tak etkawlina gual i chan khak zia un malzawlina leh khantona nasa tak i mu ui. Sum leh pai ah kitodelna lam ah te, Pathian Biak Kikhawpna lam ah te, Biak In phazaw nei na lam ah te leh a dang dang ah nasatak in ma i sawn ua, ziagual ah i masawnna zia pi penu chu kivaipuakna dan (*Administration*) phat zia ah hi ti thei ina. Kivaipuakna dan leh Kikaihua ina dan te chu a bu ah feltak ah ziksa dim diam a um a, zia haw kithugual

tak ah i zuito thei zia ah masawn leh khangto i hi pen mai ui ti thei ina. I lut guat limlai ua Court Case nei zia ah lut theng kimthei zianglo ah kum 8 lam beidawn um tak ah i um lai ua hangsan tak leh hepi tak ah ei pui gâlkai ah tuni ah Kochuam dangte ettawn thei hial khawp ah malzawna i chan teu zia in i puitu masateu zana sangtak i piau a hi.

Mizoram Synod ah amau ti dan dan ah um ding ah i kituklut zia un amau inle lungsiatna leh dawisakna tak tawh thei pha tawp in ei enkawl ua, Administration

HINNA VÂK

lam tawh kisai Seminar tam vei takte ei neipiu a, tuni'n ziagual dinmun i tungu a hi. Imphal ah gam crore 2 tavang in ei chawkipiak ua, Lamka ah Rostad School Building kilawmtak ei sakpiak ua, Ngathal ah Meitei-te pawtsansa gam liantak ei pe bawk ua, i thubuai nei sung Kum 8 lam sum leh pai in ei kithuapiu a, 2008 ah kipat vang chun Semtu Pastor 6/7 te hun sawl in tuni tiang in a lawu ei piak piak ua, i gam buai zia ua ûm leh bêl, sil leh chen etc. te ah ei kithuapi ban un a sum tang inle Lakh 67 lam ei petau a, MOU sign na a chunle Semtu Pastor i mamaw laisau i mamaw dan dan ei pe ding leh ATC ah zilna ah ei kithuapi zel ding ti a hi nalai a, a thamuan um khawp mai hi. Zia gual ah malzawl na leh masawna i chanteu zia in i Mother Synod-u Mizoram Synod chung in i kipak takzetu a hi. A chung ah ei panpinau i genteu chu a pi deu ah i hiat teu ahia, a dang dang le tampi um ina.

A leh ziagual ah masawn ah ei puitheina ziaku chu Administration phat zia a hi ti hi i khaikhawmnau ahia, a hin ziagual Administration pha nuai ah banggual tak ah ei pui a h'em ti le detail zaw deu ah hiatnawp a um zia in a bîk tak in eilawi chiadan a hung then danglam dan teu le bangzat a hem vak taklang hitiu.

1. Ei hawn kumsin in Budget siam sek maleu hin khau tak in Budget i ki control sak puau a, pawimaw i sak teu chu budget ah umlo le i bawl hangsan thei deu ua, zia hi ei chia dik pi tau hi.
2. Ei hawn semtu lâk lam i bawl hangsan ua, amau hung awp nung ah i semtu lakthaku chu tawmcha a hi nalai hi.
3. Ei hawn Sawlkar School-te haw nasatak ah semtute sawl in i panpiu a, zia chu suktawp a hi ban in Evangelist le pawimaw talo ti in na dang sepsak ahiau.

4. Sawm a pakhat dâkbawm ah kitup tak ah lâkkhawm leh kumtawp report kitup tak kibawlte, Committee sin ah sum report kituptak i bawlteu leh Office lam ah kipat ah le sum report kitup tak a umsek ziake haw hin mipiten sum leh pai etkawlna i muang ngam ua, thilpiak lam ah thatnawpna i nei ua, i khangto ui.
5. Office ah Secretary/Director chuam chuam leh District ah Superintendent i la kawi teu haw suktawm/sukbei a hina hinle sum tamtak i khawl ui.
6. Mission Field lam ah semtu tamtak tawh kitodel zolo ah i nasepnau chu SMB khut ah a umtak ziake in i zângkhaw sawt ma ma kit ui.
7. Biakna Kikhawpna ah Kikaihawaina kitup tak zui ah chim manlo ah i kikhawp sek nateu ziake in kikhawp thatnawpna i nei deu chiat un a kilang hi, nidang gual ah nawpcheng gen talo in.
8. Committee dan feltak nei ah bangkim ah punctuality i ettup thei ziake un member ten thatnawpna tawh fel tak in vai i hawm thei sek tau.
9. Nidang gual ah Office ah sem kha ngal lakte Office ah um um ziang talo ah Moderator hial le a term a zaw leh Bialtu Pastor ah um suk mai i hi tâk nau hin semtu zosia ei suhat hi.
10. Committee chuam chuam ah vaipawte a tângpi ah kum 1 or 2 ah i kithen thei sek taku hin a hithei ngal mang zinglo i hi tak ziakeun member zosia ei suhat hi.
11. Eimau leh eimau kivaiahawm thei ding ah ei sêk piting in awl awl in ei thatham tiat tiat tau a, tuhin semtu 3 bep in ei umpi tau a, a leng ua ei nutsia hun ua le kivaipaw thei ta ding ah kinepna nei in i um thei tau.

HINNA VÂK

A chung ah i genteu leh a dang dang ah i Mother Synod-u Mizoram Synod in cha tak gual ah ei enkawl ah hangsan tak ah ei chiapi ziaak un leh a kivaipuakna danu phatak mai gual ah ei pui ziaakun ziaagual tiang dinmun tungthei i hui a, Mizoram Synod chung in a vel a vel in kipak thu i gen ui. Kikhenthânglo ah ziaagual ah chiahkawm vek hi vang leuhin chu i nasat ding dan uchu...

Tuhin chu semtute lawdi,
Mission Field lam ah mamaw

zia hih ti ah Finance Campaign bawl ngai talo in i sumu chu Bank ah ziazat i mawk kawiu leh Govt. ah Income Tax Department ten tampitak ei cut piak khak diu launa ziaak in In leh lo te a crore a crore in i chaw thei ua, IDP te chenna In di tampitak i sak zaw ban un i Nampuitute bang le beidawng thaphang tak ah i umlai ua le tamkham tak ah panpi thei ah i um ziaak un “I CHUNG UN LALPA A PHA NA E” i tilo thei puau hi.

*(Zia thu ziktu di Editor
panina a hi)*

Kua ka kichenpi in, bangtik leh ka kicheng diamu aw tilo in “bangziaak ah kichenpi di ka hi em ti” i ti zawk ding a hi

Neil T. Anderson

La lungsiatpen tawh kichen theina ding in dawn kinla, la kichenpi chu la lungsiat theina ding in dawn zaw’n.

Spencer Kimball

La hawi ma ma ziaak ah hung lungsiat ka hipua, ka lungsiat ma ma ziaak in la hawi ma ma a hi zawi.

Richard Rodgers

TANGPHAI KOCHUAM LEH HALTHAKNA

~ Rev. S. Lama Vaiphei
i/c D. Phailian Pastor Bial

Kochuam a hin kivaihawmna fel tak i pawimaw ua, zia gual tho a chun halthakna le i pawimawu a hi. Thagau lam ah kisukhalna a panlo chun kivaihawmna lam bep ah fel hi chu a hul talua, Kochuam hi puakgik a hung suak khak ding lau a um hi. Kochuam kivaihawmna fel tak umna mun ah halthakna a tun chun halthakna inle umzia kitup tak a nei thei hi. Zia zia chun, pakhat ngaitha ah pakhat ngaisan hi thil lemchanglo a hi zia chun, chiakawp sak thiam a ngai ma mai.

Halthakna umzia

Pathian in mihiamte hi chaw! thei leh chau thei a hi ti a hiat zia chun in kisukhal zel sekna ding in hapta kalkhat sung a hin niguk nasepna ding ei pia, nikhat chu taksa kichawldua ding, Thagau lam ah kisukhal zel sekna ding in ei la guanggal piak hi. Thingtangpa nasem mi chun chem hiam tak in a tât ah, sôn tiang a mat chun a la mawl kit ta, tâthiam thak a ngai kit tai. Nitak lam na a semkit ah, a zing leh a tâthiam zel sek a hi. Pathian Kochuamte hile i leng ua hin Pathian nasem i hui ah, ki tâthiam thak, kisukthak,

kisukhal thak zel i mamawu a hi. Zia hi Kochuam kampau a chun halthakna a ki ti'i.

Halthakna hi tulaitak ah i Kochuam in i mamawu a hi.

Kum 2001 a khan Presbyterian Kochuam i la zawm ua, Kivaihawmna fel tak leh sum leh pai etkawlna fel tak i la zil ua, Patthian in a malsawm ah tuni dinmun hi ei tut zia chun in kipak a um takzet hi. I khanglaiteu in a man fu zaw diak ua, kivaihawmna leh sum leh pai etkawlte, Pathian pâkna Lapawl lam tiang in masawmna lopi tak muthei in a um hi. Pathian Biak In sung ah Biakna

HINNA VÂK

lasak him him te, khuang leh music thua ah Pathian pâkna lam ah ten nasa tak in ma i sawn ui. I Administrative Secretary masa pen khan Mizoram ah i chanchinu a report dan a chun, *“Manipur gam ah i suapiteu chu bangkim zilsak kawm a ngai hi: Biak In dâk khet dan, kichut dan, La pui dan, khuangkhet dan, Kikhawp puihuai dan, thupuan dan, thugen dan, pel dan, thawlawm piak dan, kivaihawm dan leh a dang dang zilsak vek a ngai hi”* a la ti a hi. Zia thu ka hiat lim a chun ka lung a awi chet pua, khuti lawm lawm lawm ding a h’em ka la ti a hi. A hinla, zia zosia hi i zil thak tak tak ua i khantopiu a la hi laizang hi.

Pathian leh i hotu masate zal ah zia tiang hi kal i suanto zinglai ua hin, Thagau lama kisukhalna tawh kisai a hin duthusam tung zolo deu dinmun i hi un a lang hi. Unaute haw, Sam ziktu in Aw Lalpa phat dan hi vak tepsin ma tiamu a ti gual a khan, ei mau ah mutheilo lam a hin laphuaktu’n kipakna tak lunggil ah ka nei hi, Jesu ei piak a hi a

ti gual a khan, chuleh, nungzui masaten kei un ka mu leh ka hiat teu chu genlo thei ka hi puau ti khawp ah mihiam in a nanzawlo sunggil lam ah kipat kipakna hi Kochuam mipi hin i nei chiatu i kidawisak uh a hi.

A pawimaw ziaik

Covid ziaik in kikhawp tamlo i kizilsak ua, i thiam man ta ma mau ah, tu a hin kikhawp tam ding ah kizilsak kit a hung ngai ta, Pastor-te leh Kochuam puituten haksatna tampi a tuak ui. I gam a hung buai ah kikhawp theilo hun a hung tam deu deu ah, Kochuam sang ah chi leh nam lam te, khawtâng leh politics ngai pawimaw zawknate a hung piang ah, puitute a suluhai ma mai.

Internally Displace Person (IDP) dinmun in mitamtak i hung ding kit nalai ua, ziate lungthim ah hin bangma dang in mun a changzo tapua, nisin nekkhawp a um nakleh lungawi mai, Kochuam leh Pathian nasepna ziang ah le sutu la nuam tampi i hung um kit tau hi. Lungthim chinchai neilo ah, bangma lunglutna

tak tak nei talo mi tamtak a hung siamdawk nalai hi.

I gam buai tawh kitawn in sum leh pai mamawna a sang deu deu ah, nidanglai ah i la ngamlou thil tamtak i hung bawl ngam tau hi. Etsakna ding in kani lei bawlte, zu huan ziangte, damdawi khamthei ah sumdawn maite le i hung ngam tau a hi. I dinmun siatnateu leh i haksatnateu hi Lalpa kengbul ah tut sang in siat khawlawna in i mang gam tau hi.

Zia gual dinmun se tak ah i dinlai ua, i nam i gam leh i Kochuam siamphatna ding a hin La phuaktu in, “Thiamna chitna thaikawi in i gam hi hawi puana, Lal Jesu nga bangah a lenlo ngal chun” a ti hi ngaitua dawk thak kit in i gam sung ah tui kitingte chawkpul ah i miten damna a chankit theina ding un lo neitu kiang ah chun dawn hitiu.

Panlakna dite

Panlakna ding a tam ah, panlatu ding a hin i kisentua ua, keiman bang ka bawl thei diam ti hi i buai piu ngai ding a hi. Revival tunna ding ah chun

Revival Committee leh Revival Speaker-te hi i mitthau in a hung kilang masa pen hi. A ban ah Pastor-te, Upate, Kochuam ah lawiupa lamte hawn pan hung la leu ti ah eimau kitha awl mai a bailam ma ma hi.

Khasi gam Revival La a khan: *“Halna ei pian Lalpa, keima ah kipan hen”* ti a hi kha. Zia revival hi Headquarters lam ah hung kipan henla, tui a suk ah a luan gual in pha tak in luang leh duthusam chu a hi ngei hi. Maleh, Pathian thagau chu tui gual a hia, a niamna lam lam ah luangkhawm sek a hi zia in, revival tung ding dawi ah mamaw kisate, Lalpa ma ah kingainiamte kiang ah luanglut masa phawt mai ding a hi. Keima ah kipan hen ti thei pen pen chu a bul pantu hi mai ding i hui. Lalpa Thagau in zalen tak ah a thunun thei ding, mani dawigual hilo ah, Lalpa Thagau pui ah um thei ding mi Lalpan a hawl zing a hi.

*Halna ei ei pian Lalpa (3)
Keima ah kipan hen.*

*(Zia thu ziktu hi Editor palina
a hi)*

THIANTHONA HI PATHIAN BATNA A HI Lamka hi Pathian tawh bang chan ah kinai?

~ Pu N. Neihsial
Delhi

A chung ah thu hi kua zik a hi i hiau em? Bible ah kipat kiladawh hi ding ah gingcha pawl le ki-um maithei. Bible châng tamtak in thiangtho ding ah kiziltîlna leh thiantho phatna gen maleh, Bible ah kipat kila a hi puai.

A chung ah thu kigen hi khawvel ah kochuam hing leh lianpente lak ah khat, Methodist kochuam phutdawktu, John Wesley in kum 1773 ah a la gen a hi. England ah *Industrial Revolution* hunlai ah hêtlawklo ah khawpi khanghât ma ma hunmil ah a la gen a hi. London leh Manchester khawpите ah chunlampituam leh chênna in tiang in kîdak (nîn) a thânglêt a. Thil siamna (*factory*) chuam chuam apat nîn/ kîdakthe chu luaksuak-um leh thawkwawlo di dinmun in a la um hi. Khawtâng thianthona

lam dawpsânnâ ding ah sên leh so chu factory neite leh sawlkar in a sêng nuam puau a. A tawp in, *Public Health Act* 1875 (Mipi Damtheina Nasep) thupûkna chu, Juda mi United Kingdom Prime Minister masapen, Benjamin Disraeli malatna'n, siam ahia; a thupiu chu "*Sanitas Sanitatum*" (Thildang zosia sâng ah Damtheina) ti a hi.

Tû nai ah Lamka khawpi ka chia ah chun, dawr ah thil ka vachawh leh, numei upa nailo-thiang bêklo khat in, "U-Mang, la pension nung ah le bang ti dan ah naupang

cha' kilang thei la h'em?" a tia. Kenle tawt pum in, "A hi, naupang ah ka kilat zia chu, nang-u kâl khat ah khatvei la kisil lai ua, kei nisin ah kisil ka hi" ka ti leh, Dawr ah um mi zosia chu a nui dup dup ui.

Lamka ah lampite ah hin chia le chun, a bîk in New Bazar ah mezawkna lak a khun, mi gî- thiangtholo leh baknêtnût tampi mu di a um hi. 'La kisil nunung pen ni bangtik a hi tam?' tia dawt ding ah pha mi a tam hi. Eimite chawndan leh mizia hin thianthona hi a la kengkawm puai ti chu ka he'i. Ka pianna khua ah ginglo upa pani chu kumkhat in khatvei bep kisil, zia chu mangchawm zaw ni a hi; a vanteu chun khatvei sawp khêl a dai pua, chawmlo kâl in a ek a, paimang a ngai mai sek hi. Thil dangdâi leh vâng tak khat chu a hi! *Guinness Book of World Records* kidemna pangthei hial di a hui.

Thianthona lungthim hi khawtâng, vantâng leh mimal ah i tâksapnau hin chanchin

a nei hi. I pu- i pateu kha a lemchânna lam lam ah kichawn vêl vêl nam a la hui. Khaw khat ah kipat khaw chuam ah, a lawm ah pêm a hiloleh sungkuan ah pêm sek a la hui. A hina tak in, khaw-hausa chung ah khaw chaga thuneina sangpen chu, khua nusia ah, khaw dang ah pêmсан динг ah suklau leh vau a hi. Zia kichawn vêl chiadan hin lungthim lawng leh detlo a neisak ah, khaw khat ah chêngdenlo ding ah kingaina lungthim a nei ui. Zia chun a puakdaw chu, tunung â ding gêllo ah, In leh lo leh kîmvêl ngaisaklo leh khuallona a hi. Zia hin a khawsakdanu a sukhka, thianthona le a khawikha a hi.

Zia bân a chun, khua kisât dan leh inchen siam dan a hi kit hi. Gâl leh sa bân ah thokang lak ah bitna ding in, khua hi tâng chung ah din/sât a dawî tângpi sek ui. Zia hi a dik zinglai in, haksatna dang umte chu, mei-thing chawmkhawm, nêk leh dawn lâklut, nisîn tuikhai a hia;

HINNA VÂK

zia na gum tak hi numei leh naupangte mawpuakna deu a hi nalai hi. Zia ziaak chun, khawtâng, sungkuan leh mimal in thianthona lungthim a putdan tawh tui haksatna hi changtak in a kizawpmat hi. Zia hi chawndan khat ah hung pangto in, nisin ah kisillo chu chiadan tângpi a hung hito a, dâilen zaw ah thing-nâ leh mawl ah taw thek tite le thikmak a hi puai. Van sawp thian zing di ngaisaklo chule thil lamdang a hi puai. A diak in Khristian i hi masang ua khawsak dante kha, kîdak-um leh huaisia a la hi'i. A gan vâk uh thiangelo tak tak Uicha, Vawkcha leh Akte kha zalên tak in, sungkuan ah pang gual mai in, Insung in a khawsau a, a ne in - a dawn mai ui. Vawk, Bawng leh Sial-te chu Innuai in a chêng ua, thosi-thovâi te'n bawm in, thawm navêk-um tak a siam sek ui. Khawsung lampite chu vawk/bawng êk-keu in a dim a, vangphat um tak in, gam kên ziaak in nin a kikhawl den pua, chuleh a hui a thian ziaak

in, khaw mite chu a damthei ua, a hât bawk ui.

Khristian shakhua hung lut nung in, ziagual kîdak-um chawdan hi nasa tak in a hung kisang danglam hi. Ganchate tawh chengkawm gual mai ah umnate a hung bei hiai hiai a. Missionary-te leh Kochuam puitute khap ziaak in, khawhelo khawp khawp ah zu dawn le a bei hiai hiai tai. Pathian nite leh hunbîk te, ets. Khristmas hunte a hin hawitak leh thiangtho tak ah kicheite hi kizilto in, Biak In ah kikhawpna ah kitûp leh feltak ah kichei hi naupang leh khanglaite ah kipat kineppi a hung hi tai. Zia chiadan thak hin nasa tak in thianthona lam in masawanna a hung tut hi. Maleh, khawtâng leh mimal ah chîndan dawî-umlo hunkhawp a um nalai hi. Chîndan hisêllo, sungkuan a hiloleh mi chuam chuam in, kuangpi khat ah annêkkhawm hi a bei nai pua. Zia gual tho chun, haikhaw/thîkhê khat mang ah me-tui kihawp sân, chuleh, annék zaw ah kuang

khat ah khut sawpkhawm, (mi tampi khutchâm khat kikawp) tite hi tuni tiang in chîn a hi nalai hi. Zia gual annék chîndan hi mi chuamnamdang khenkhat, ei sâng ah chungnung zaw ah i kawilo, te â ding in kidak-um a hi sek hi.

Thianthona lam ah chawndan thîthillo leh bukimlo pum in, Lamka khawpi in i kipunkhawn ua. Masang ah chun, khawpi chu government nâ neite leh sum neizawte chênna ding ah ngai a la himaleh, tuhun ah hin a kilêbul tai. Hîpna leh nawna thil chuam chuam zia in, khawpi sung chu chaga zawte'n hinkhua nawpzawkna di ngaituana'n a zuan zung zung tau. Zia hin khawpi sung chêndan a sudanglam a, mun neite'n building In a sau a, mun chuam in cheng in mi luasak leule, amau â a hi tho tho hi. Lamka khawpi a hin lampi, nâla-kuak leh nîn painate hi guanggalna kitûp a um pua, chun tui lâkna tiang le

guanggal lawk a umlo zia in, khawtâng leh mimal thianthona a suhkha ma ma hi. Ziate zia a hin, Lamka khawpi hi mipi pun dungzui in, nîn leh kidak a pung a, nîn khawlina bawm gual mai in, mipite'n haksak tak in hinkhua a mang ui. Zia hi tuhun leh hun hungtung di tiang ah haksatna a hung hitai. Dawtna pawimaw chu: Thianthona ding ah pan lâkthakna bei in bangchan khawsa thei nalai di i hieu em? Natna leh hi-lêng, bomb gual ah puakzâk thei chung ah ipmu leh khawsa, i hieu em?

Vision Lamka seminar
kimang zo lim ah khan, Pi Hawiphal, Asia Antioch Seminary ah Principal chun ngaithatute ngaituana kaithawna di'n zia gual hin a gen hi. 'Europe gam ah kum zabi 14 ah khan hipi 'The Black Death' kiti kha a lêng ah, Europe mipi kimkhat tavang in thina a tuak lai ua khan, Judate chu zia hipi khan a suhkha puau. A zia chu, a lekhabu'u Torah gen

HINNA VÂK

gual in, thianthona a ngai pawimaw ua, annék ma leh zaw ah khut sawp di, Sabbath masang ah taksa suk thiantho di, kisil zing di, tite hi diktak in a zui ui. Zia hin etsakna pawimaw tak ei piai. Kochuam hi kipumkhawanna lak in a hatpen a, mipite thuzaw theipen le a hi. A zia chu, Kochuam puitute hi thiamna lam ah le titpen leh khawvel lianzaw mute le a hui. Zia chu hi taleh, mipite, sungkuan leh mimal siamphatna di leh thianthona ah masawanna ding ah chun, Kochuam hi khuam pawimaw a hi ti a kichian hi. Bible ah le khawtâng leh mimal thianthona ding ah thuhilna tamtak mu di a um bawk hi. English thupil khat in ‘Panpi nawpna hi Insung ah kipan a hi’ a ti gual in, thianthona hile mimal leh Insung ah kipan di a hia, a bâh ah khawtâng leh gam pumpi ah a hi di a hi.

Khawtâng siam danglamna ding ah pawimaw dang kit chu thiamzilna School a hi. Ka cha panite hi Tokyo ah

thiamzil a hui a, Delhi a hung kilekit nung un, ni khat chu vaiguan khat ka va uap ua. Car sung in thai-ngiat a hawm ua, a chûnna chu car tukvan ah ka paidawk mai a, a paniu chun, “Pa, bang atia lampi la pai ziang a h’em, nînawm um hun ngakte” tî’n a hung kiko ui. Zia pat ka hêtdaw chu, School leh i kimvêl hin mihing hi ei thunun ma ma hi, ti a hi. Zia hi Lamka mipite’n le i pawimaw takzet ui. Lamka hawizawkna ding ah kisân danglamna tak tak chu khangthakte ah kipat a hi a pawimaw hi. Siamphatna ding ah theina leh hun tam neitu chu khanglaite a hui. Vision Lamka in Lamka khawpi siamphatna ding ah mathîl a neite sukpitin theina ding in thiamzilna munte’n pan a lâk thaku a kûl takzet hi, umna ding in.

Tu hun ah Lamka khawpi - mimal, Insung leh khawtâng thianthona dinmun hi en hitiu in, Lamka hi Pathian tawh bangchan ah kinai a hi em? tî’n kidawng chiat

hitu. September 1994 kum ah Gujarat khawpi, Surat ah hipî lêng kha khenkhat in he di i hui a. Zia hipî kipatna bul khale thiantholo zia k a hi. Nîn kikhawlkhawmna kha sazu leh natna hik chuam chuam kisukpunnamun a suak a, hipî a kithêzâk khawlaw â hi kha! A thi kha 56 bep himaleh, mipi Nuai 4-6 kikâl in khawpi a pawtsan ua, zia kichawn zia k ah kisêng chu million 600 vel ah sût daw a hi.

Kisiamphatna ding ah zia gual hipi tuak ding in

i tit puau, ti i hechiat ui. Government in ‘Swatch Bharat’ ti thupi mang in gam pumpi huap in thianthona, kitângkopi maleu, eiu ma ma i kipat ua, khangthakte â ding ah thianthona bul pan ah, khawvel phazaw siam di’n kipan hitu.

Zia zia k chun, thianthona hi mimal, Insung leh khawtâng ahte’n panthak tai tiu. Midang in ei hung bawl piaklo di a hi. Hung un, kipan hitu in, Lamka leh mipite hi Pathian naizaw di’n pui hitu.

Pathian ah kipat Thagau Thiangtho panglo in bangma i hi puau a, mat tâklo, a mûtvel di neilo lawng gual bep i hui.

Charles Spurgeon

Mihing theina, zil thiamna leh tuak-hiatte hi Thagau Thiangtho panglo in Pathian nasepna’n a mat thei puai.

Warren W. Wiersbe

Pathian chu Thagau ahi’n, ama ho dingte chun, Thagau leh thutak in a ho diu a hi.

Johan 4:24

LALPA DAWIGUAL IN I BAWL NAU EM?

~ *Upa Ginkhanpau*
New Lamka

Lalpa Pathian dawigual in i um un i khawsa nau em? I hinkhua matdan tawh Chanchinpha a kituak na em? Lalpa Pathian dawidan i zui khaklo ah i bawl khaklo chun mi vangsiapen, ei le ei kithem, kinem thawn hi di i hiu. Kingaitua, kikhualchil leh kietchian puim ah i bawl khaklo a hi chun kisiam pha hitiu in, Lalpa Pathian dawidan tawh kituak ah khawsak leh kimatchak di i guat ua, i kimatchak ua i hinpi dingu a hi. I Bible un Pathian dawidan genna a tam a, ziate haw chu suithak kit hitiu in ilunggil un tepte hitiu in zui leh sukbutin gaw taitiu.

Pathian dawigual chu bang a hi em?

Pathian dawigual chu- ‘a Chapa, a chung ah a lungawi leh a kipakna mama’ chu ginchak a, a thugen ngaithak di, a thupiak te zui leh a hindan gual a hin di tite a hi. Lalpa Jesu’n le, ‘kuanle kei ei hepi chun ka thupiak te zawm in a’ ati a hi. Ama i hepi ziaka a thupiak zui di, Ama hin gual ah hin di, kingaitawm tak leh thunuai gawl tak leh nunnem tak ah hin di a hi. Lalpa Jesu kha ZILSAKTU, Mapuitu leh

a Luchangpen himaleh a kingaitawm a, pakchatna a hawl pua, dinmun sang le chu diak puai. A nungzuite keng a sil piak nalai hi. Kingaitawmna hinkkhua a pawimaw hi.

Kihepi tuana le Lalpa dawilam leh ngaikhawk khat a hi. ‘Keima’n ka hun hepi gual in nangmau le kihepi tua un ’ (Joh 13:34). Zia hi thupiak thak ei piak a hi. Lalpa Jesu hin Hepina a hau ma ma ziakin Hepina hi a ngaikhawk ma ma a hi. Ama i hepi dingu, zia gual ma chun

midangte le i hepi ding a hi.
'Nang ma la kihepi gual in la
invengte la hepi ding a hi' ei
ti a hi. I zui tei tei di tina a hi.
Lalpa chu i hepi tak tak nak a
hi leh midang hepi di chu a
umsa a hi.

Nunneamna, dawtheina leh
kingaitawmna tite haw hile
a umsa a hui. Johan 14:23
na ah khan '.....Min keima
ei hepiu chun ka thupiakte
zawm in tiu in; zia tak chuleh
ka Pa'n amau chu hepi ina;
chuleh a kiang ah hung ing
ka tiu in, amau ah chun hung
cheng di kahiu' a ti a hi. Lalpa
hepi ah a thupiak zawp chu
' Apa Van ah um ' dawilam
bawl na a hi chu a kichian hi
maw! Mathai 25na a khan
Lalpa'n a dawidan a hung
taklang kit a; ni tawpni phat
leh a changlam ah um mite
kiang ah khan a thilbawl zia
ka a chung ua a lungawina
thu a taklang ah: 'ka gil a kial
in nek di lei piau a, ka dang
a châk in dawn di lei piau a,
sillo chenglo a ka um in ka sil
di kachen di lei piau a, damlo
ah ka um in lei hung ve ua,

suangkul ah ka um in lei hung
kan thau a.....' changlam ah
um mite chun, ' Lalpa khawi
ah gilkiel a la um ka muu a
la nek di ka hung pe khau a
ahem, khawi ah ngawnchang
ah la um ka hung muu a la sil
di chen di ka hung pe khau a
ahem.....' tin tiu in.

Lalpa'n 'zia a neupente
chung ah la bawl u chu kei
chung ah la bawl uh a hi ti' hi
Lalpa Jesu lopina kilat diakna
hi ah ka het chu zia Bible
Thu hi a hi. A lopi khawp mai
hi! Daikil kal ah migenthei
ma ma nek di neilo, sil leh
chen di neilo la va panpi kha
Lalpa'n ama chung ah la bawl
gual ah ala kilak a hi chu.
Chuti a hi leh chu Lalpa'n
ei malsawm dungzui ah
genthei haksa te sawmdawl
ah panpi chu a dawilam a
hi zia in bawl takluat di, i
nei dungzui ah kiphah tak ah
Lalpa zia ah panpina piak
chu kipadam lo kei a bawl di
a hi ti chu a kichian hi. Hatlo
te, mip hazolo te, panpitu
di neilo te, mi musit leh
tawden a um te, ei thukkiak

HINNA VÂK

zolo dite, panpi a sawmdawl di, bangma amau ah kipat mukit di kinemlo leh a gûn di kinemlo ah panlak di a hi. Bible sung mun dang dang in le Lalpa Jesu'n genthei te angaikhawk dan a taklang a hi. Nasep pha chu diktak ah vaihawmna tawh Hepina tawh kithua di a hi.

KI ETCHIAN NA

Lalpa dawigual in thil i bawl nau em ti leh ama dungsun i hi nau em, Lalpa Jesu mihina ei mau ah a um nam ti haw hi vak kikhual chian hitiu.

1. I mihinaw ah: Lalpa Jesu dungsun i hi nau em ti hi i mihina ah kipat kilang/ muthei a hi. I kingaitawm na'm? I dawthei na'm ? Mi sang ah phazaw leh sang zawin i kikawi em ? Kikhiakniam haksa i sau em? Mi pakchakna i ngai sang em? Thilpha bawl mi'n ei hiatpilo chun nuammaw i sa em? Itsikna leh mi thil nei leh dinmun sang i eng em?

2. I kicheinaw ah: I kicheinaw leh i sil len chên hin thu tampi

a gen a, i mizia leh i lunggel le min a hedawk thei ui. I sakhua tawh kituak leh kimil ah kichei hi ei Khristiante'n i bawlllo theilo a hi. Bible a hin dress code ti dan a um chet pawna chu a tangpi ah zui di vang a pia a hi. Deut.22: 5 ah khan Pawsal leh Numei kicheina in gamgi a nei di thu a gen hi. Pawsal van chu Numei in a matlo di leh chuti ma chu Numei van chu pawsal in a mat lo di a hi. 1 Pet.3:3-5na leh 1 Tim. 2:9-10 ah hin kichei di dan a gen hi. Chun, 1 Cor.6:18-20 na in i taksau ja bawl leh thiangtho tak ah kep di, Pathian temple a hina dawpsan ngai a hidan a gen hi. Kicheina hi a diak a Numeite chitthei ten a ngai hi. Mi mit la, mi lungthim kaimang, Numei leh Pawsal kal thu ah suangtuana daw i umlo nei sakthei a kichei lo di a hi. Skintight (gakten) puanak leh tawka chên ah, i 'van' nei zosia phosal hin pawsal te bep hilo numei chanpите le chodawk thei ahi ti het a ngai hi. Puanak âng niam talua,

kek sau talua, loose deu mai, tangbawk leh tangbawk kikal ah chiangkawt kimu chian thei te ak pum ah Biakin kai chu mi lungthim lamang sek a hi. Nîk sîng deu chêng a malpi zosia latsak ziang ti haw hi kilawmlo hial a hi. A khawkna chu Lalpa Jesu in Matt.5:28 na khan kichian tak in a gen ta, gen be a ngai tapuai. Ngaituana lungthim hi Pathian in a ngai pawimaw ma ma a hi. Zia zia chun, ngaituana buak, thianglo ei nei sak thei taphawt pumpel di a hi.

3. Bible sim leh Pathianni matdan ah: Bible sim tampen leh hun saulo sung ah simsuak hi guat haw hi a se puai. A hi'n i gen nawp chu i Bible sim kha hetchian guat di leh phatchuampi guat di ti a hi. Sim mun a pha, Bible chang te mulo ah gen thei di a hi. Bible chang i het pen kha mangcha in thagau in ei kihopi thei a hi.

Pathianni hi Pathian ho leh biakna a hi. Ni guk sung eina

i sêm a, zia ni pen hi Pathian â ding ah i piak dawu a hi. Zia Pathianni hi a hilo pen a le za ah sawmgia (80%) bek Pathian pe leu hin dawu um ma ma a hi. Biakin a dakkal ni/thum vel va mang, zia chule pelkal ngakla ma ma nalai set. Pel phat phat a eima mimal program matna nei ngal, kivetuana te, i chia manlona chia te, chanau te tawh kipawl khawmna hunte, leh a dang dang te hi haisan thei hileh pha mama ina. Mi khat chu thil pian la, va kikawppi zel le chin a kipak na diam? Kingaitua phai tiu!

Lalpa'n simtu zosia kingaitua thakna nei thei di khawp in phatchuampi thei ding in ei malsawm piak ta hen. AMEN.

(Zia thu hi a ziktu'n a hun nunung lam ah Hinna Vâk ah sua ding ah a hun zik, ei beisan nung ah hung kisua a hi. A thuzik nunungpen mangcha'n Lalpa'n ei maljawl chiat ta hen!)

Dawtna dawnhutu

~ Rev. Ph. Thianneilal Vaiphei
i/c Delhi Kochuam

Dawtna 1-na : *Pathian laka bangtin midik ka hi thei diam?*

Dawnhuna : Pathian tawh kichamna di leh midik hina ding ah chun 'thil diklo' - gitlona chu bang a h'em ti hiat masak a ngai hi. *"Kuama thilpha bawl a um puai; khatcha le a um puai* (Sam 14:3). Pathian thupiakte kãl in i hing ua; i lengun belum vakmang gual i hitau a hi (Isai 53:6). Chanchin phalo tak chu *"Gitlo man chu thina a hi,"* ti hi a hi. Mi gilote chu thi ngei ding a hi (Ezk 18:4). Maleh, Chanchin Pha chu zia hi a hi. Pathian hing chun hukdam ding in ei hung delzui pek ua; *"mangthaite hukdam ding leh va hawl dinga hung ka hi,"* ti'n Jesu'n a la gen a (Lk 19:10), zia nasep sukbutinna chu kraws in *"a kichai tai,"* (Jn 19:30) ti'n a zawna a hun siam tai.

Pathian lak ah midik hina chu gilo hi' kihiatna pat hung um pan a hi. Gilo kahi ti kihiatte chun kingaitawm tak in Pathian kiang in soal a sim ngal sek un (Isai 57:15), gitlona haisan ding in kingaituana a

nei sek ui. *'Mi'n lunggil ah a gin chun dikna a mu hen, kam in a puangdawk ah, hukhinna a mu sek ui'* (Rom 10:10)

Soal sim leh lunghei ti chu ginna tawh a chiakhawm sek hi. 'La kam ngei in, *"Jesu chu Lalpa a hi,"* ti la puandaw ah, *"Mithi lak ah kipat Pathian in a kaitho hi,"* ti la lunggil ah la gin chun hukhin hiding la hi' (Rom 10:9) ti a hi. Dikna tihi Pathian in i thasang ua a thilhite gin leh ginlo in nasa tak in a kingam hi. Pathian in Hukdamtu ding a hun sawl a, Ama chu la gitlo tatna ding in a hung kipiadawk a (Jn 1:29), *"Kua hitaleh Lalpa min lam tapote chu hukdam hin au,"* (Nas 2:21) ti thutiam ei hun piau a hi.

Chapa taimang tekkin thu kha lungheina leh ngaidamna chiakhawm dan etsakna a hi. Chapa naupang zaw khan gitlona zachat um tak hi in a Pa thilpiak chu a va peimang a; a thil hi diklo zia a hung hiatdaw phat in a Pa In lam ah kile di a ngaitua a, *"Chapa ti*

tâk le ka hi ta puai, la ma' leh Pathian ma'n thil ka hikhial tai," a ti ta mai hi. A pa chun a chapa migilotak hung kile chu a hepina ngai bawk ah chun a la lamtua hi. A hikhial zosia a ngaidam in, a lunghei chu kipak tak in a lawm ta mai hi. Pathian chu sual simte ngaidam ding ah a thutiam ah ginum tak a hi. *'Lalpa'n lungthim ah kisik ngawi ngawite chu a nai sek in, kinepna neilote chu a hukdawh hi'* (Sam 34:18). Sual sim ah gitlona hikittalo ah Lalpa â ding ah hing ta la hi chun midik la hitai.

Dawtna 2-na : *Pathian a um em? Pathian a um hi ti hiattheina leh chianna a um em?*

Dawnhuna : Pathian chu thilsiam gual ah muthei leh khawi thei a hilo zia in science ah Hydrogen 2 + Oxygen 1 = Water ti ah proof thei a hi puai. Bible chun Pathian a um hi ti hi ginna ah pawm di a hi a ti. 'Ginna lo in Pathian chu sukkipak thei a hipuai; kuale Pathian kiang ah hung chun, Ama chu a um ngei hi ti leh, Ama hawlte chu kipakman pesek a hi, ti a ginchâk diu a

hi' (Heb 11:6). Pathian chun pawimaw sa leh khawvel mi zosia kiang ah hin a um ngei hi ti muthei ah hung kipuung thei a hi. Maleh, hung kipuung taleh 'Ginna' mamaw talo di a hi. 'Jesu'n a kiang in, "Thoma, nang in lei mu zia ah ei gingcha la hi maw? Mulo ah ei gingte chu mi hampaha hui," a tia' (Jn 20:29).

Chuti himaleh Pathian a um hi ti chetna umlo tina vang a hipuai. Bible chun, "Vante khin Pathian lopi zia a hiatsak un; vanthamjawl liantak khin a khutsuak a latsak hi. Sun in sun kiang in a hilsawn ah, jan inle jan kiang in hetna a latsak sawn hi. Thu ah gen leh pau git a h'em le a ngaipuai; a awu chu hetdi a um pua'n; ahi'nla, a awu chun lei chung zosia a fang suak in, a thuu chule kaw l kîmvêl tiang in a thang suak tai. Vante ah khin nisa â ding in puanbûk a jak pal piak ah" (Sam 19:1-4). Aksite, vante, leite, tuite leh huite mak leh mawi ziate hin a siamtu leh a guanggaltu a um hi ti hiat thei a hi.

Thugentu 3:11 chun, 'Thil tincheng chu ama hun tawh

HINNA VÂK

kituak chiat ding in a siam ah; chuleh, thil tung tasa leh a hung tungkit dite ngaitua theina a pia'n; himaleh, a lim ah kipat a tawp tiang ah Pathian in a bawl dite chu hetdaw theina a nei puau hi,' a ti. Mihing khawhetna chawmcha tak hin Pathian hina leh a umdan a hetchian zolo ziak in Pathian a um puai ti ta mai a um sek hi. Maleh, khawvel tuanthu ah kilang chian ma ma khat chu nam zosia, khantona zosia leh gamtin ah mite a tam zaw hin bang pathian a h'em a um ngei hi ti taksanna a nei ua; zia taksanna nei saktu hile a um ngei hi in ginchat a um hi.

Bible gen bâk ah Pathian a um ngei hi ti het theinate chu vak en hitiu.

1. *Ontological argument*: Latin pau ah 'ontologia' a hia zia chu 'science of being' ti a hi. A umzia chu thil umlo chu mihing in a hia thei puan, a umlo chu ginchat thei a hi puai. Maleh, Pathian chu a um ngei hi ti khawvel mihing a tam zawn a gingchai. Umlo hileh ginchat thei hi puan a ti'n Anselm in a hun gen a, ama ngaidan chu Duns

Scotus, Descartes leh Leibniz ten a hun tângkopi ui.

2. *Teleological argument*: Lei leh van leh a sung ah thil um zosia hung umdan et in a hung umsaktu, a siamtu a um ngei hi ti hiat a hia; zia a siamtu leh a um saktu chu Pathian a hi. Tui ah ganhingte, vanthamjawl ah aksite khi a guanggaltu umlo chun hung mawk um thei puan a. Lei leh nisa hile zia sang ah kinai zaw deu leh sa taluan tin thil hing um thei puan tin, kigamlat deu kit leh vawt taluan tin thilhing um thei diak pua'na. Lei kipei dan hile hintheina tawk speed ah kipei a hi.

3. *Cosmological argument*: Thil tawi zosia hin a tawisaktu a nei hi. Lei leh van ah thil um tawi (effect) zosia hin a tawisaktu nei ngei a hui. Thil tawisaktu leh thil dang in a thununlo pakhat a um a, zia chu Pathian a hi.

4. *Moral argument*: Namtin, chitin leh gamtin hin chawndan (culture) leh chiadan a nei ua, dik leh diklo hetna a nei chiat ui. Tualtha, zuau gen, gúkhât

leh lunggel phalo tite hi khawvel pumpi'n a pawm puau. Thiangtho Pathian chu umlo taleh zia dik leh diklo, pha leh phalo ti hetna chu khawi ah kipat hung a hi ta diam?

Ziagual tuk ah Pathian a um zia chetna leh hettheina kichian tak tak a umlai in, Bible chun mite'n "Pathian thutak chu zuau ah chansak in, a Siampa chu ho sang in, a thilsiamte chu ho in a tacha zaw tau ah; amau Siampa chu kumtuang ah pâk tâk a hi! Amen" (Rom 1:25) ti in a gen hi. Mihingten Pathian a ginlonau suanlam hun siam intinu, maleh suanlam siam di nei puan au a ti. 'Khawvel siamtil ah kipat ama kumtuang thilhitheina leh, a van hindan, mit ah mu theilo chu, a thilsiamte ah kipat chun hiatthiam leh mu in a hung umtai; kuama'n suanlam a nei theilona ding un (Rom 1:20)' ti a hi. Mipil kisa khenkhat in Pathian a um puai, a tiu ua, a tina ziaku chu 'not scientific' and 'there is no proof' ti'n suanlam a siam ui. Ziate chu Pathian a um puai ti hi 'a scientific em' or 'a

chetna bang a h'em' ti a dawt ua leh a dawnhu thei puau. Khenkhatte chun 'Pathian umlo proof hawl na zia in a um ngei hi ti proof na ka mu dawk tai' tite a um ui. Mipil leh mingawl tiang inle Pathian min pau chuam chuam in a kinei a, zia chun Pathian a um ngei hi ti hetchianna proof khat chu a hi. Pathian a um ngei hi ti hetna bang a hi em? Pathian tawh nisin i kiho ua, i pauchap ua, ziate hin a um ngei hi ti a suchian hi. A umlo khat gël in vak ho di kisa tia, hitheilo a hi. Mi ziang le a umlo khat chu kiho theilo a hi. Pathian chu muntin in a um a, tichun, muntin in i ho un, i pauchap seku a hi. Pathian a um ngei hi ti chu ginna ah chian a hi.

Dawtna 3-na : *Pathian a um hi ti chungchang genchianna a um kha ta em?*

Dawnhuna : Tu masang ah kipat a khan Pathian um chungchang kinialna a la um a, Pathian um gingchate chu ginna diklo (delusion) leh ngaituana chim manglo (irrational) ti hial in a la gen ui. Karl Marx chun Pathian

HINNA VÂK

um gingchate chu a lungthim buaite (mental disorder) a hi ziaak ua ngaituana diklo gêl a hui a ti. Psychiatrist Sigmund Freud chun Siamtu Pathian gingchate chu ginna diklo, amau utna sukbumna mai a hi a ti. Philosopher Friedrich Nietzsche chun ginna hi thutak hiat nawplona a hi a ti. Zia mite pathum thugen hi tulai ka pil hi, science ka thiam hi ti ten a hun tângkopi ua, Pathian gingte chu lungthim lam buai a hui ti in a hun gen ui.

Pathian um gin chu ngaituana chîm matlona ziaak a hi em? A hipuai. A hileh, Pathian a um ngei hi ti ah nialtu a um em? I, a um hi. Bible pawlam ah kipat tulai Pathian um ginglo old leh new atheists kitite nialthakna leh Siamtu gin hi a dikna a um em? I, a um ma mai. Pathian a um ngei hi ti gendawna ding ah chun thudik dawt di a hi. Bang a tia bang hem khat lungthim ah nei sek i hui em? Bang a tia zia tak ah um i hui em; bang a tia lei hi zia tak ah um a h'em; bang a tia lei leh van hi zia khin um a hui em?

Bang a tia lungthim ah bang hem khat nei sek i hui

em ti dawnhuna ding ah chun dawnhuna pali a um thei hi.

- 1) A tak (reality) chu kizuauphepna (illusion) a hi. Philosopher leh Mathematician Rene Descartes chun "I think, therefore I am," or "I think, therefore I am not an illusion," a la ti'i. Mani kizuauphepna (illusion) ding ah chun banghem khat ei zuauphep di a um a ngai hi.
- 2) A tak chu mani ah kisiam a hi. Zia thu hi philosophy ah chun analytical false a kiti. A ziaak chu mani ah kisiam la hi chun siam la hi ma' um ta la hi a ngai a, zia chu thilhithei a hi puai.
- 3) A tak chu mani ah um zing (eternal) a hi. Jonathan Edwards chun thil khat a um a; bangmacha (nothing) chun banghem khat a siam thei puai. Zia ziaak chun, thilkhat leh a umzing sa khat chu thilkhat siamna ding in a pawimaw hi a ti. A tak chu a kisiam hilo in mani ah um zing tina a hi.
- 4) A tak chu thil banghem khat mani ah umzing chun a siam a hi. Thilsiam hilo mani ah

um zing chu Pathian i tiu chu a hi. Philosopher J.S. Mill chun, “Lunggel hin lunggel ma a siam thei hi ti chu mani ah chianna a um hi,” a ti. Chuti a hi ziak in kumtuang ah um zing Siamtu chu a tak ti ah i hiatteu hung umdaw sakpa chu a hi.

A tîl ah Pathian um gingo a la hi Lee Strobel chun, “Thil pawimaw tak ka hetdaw chu, gingo hina ding ah chun bangmalo hin bangkim a hing hi tite, hinna neilo in hinna a hing hi; thil hawi tak takte hi guanggalna bei ah hung um thut a hui; bangma helo chun hetthiamna a hing in, mawl tak chun ngaituana chîm a hing hi tite taksan a ngai a. Ziagual thil vak taksan ziang di chu kei a ding in a lian taluan ka hithei puai. Kei vak ngaitua dan in Khristian khawhei dan hi atheist-te khawhei dan sang in a taksan um zawi,” tin a la gen hi. Philosopher Mortimer Adler in, “Thil a um hi ti dinpina chu a chet (proved) thei in, thil a um puai ti nialkalna chu vang a chetna a um thei puai,” a ti gual in atheist-te hin Pathian a um puai ti a chetna a gen thei

puau hi. Zia ziak chun khawhei thei deu atheist-te (Pathian taksang lote) chun Pathian a um puai ti hi ka chian (proved) thei puai ti in a kinukdawk mai sek ui.

Dawtna 4-na : *Pathian chu a tak a h’em? Bangti’n Pathian chu a tak a hi ti ka hia thei diam?*

Dawnhuna : Pathian chu a tak a hi ti i hiau hi. A ziak chu i lak un chi thum in - a thilsiam ah te, a Thu ah te leh a chapa Jesu ah te’n a hung kipuung hi. Pathian a um ti chetna (proof) bailam tak chu a thilsiamte hi a hi. ‘Khawvel siamtil ah kipat Ama kumtuang thilhitheina leh, a van hindan, mit ah mu theilo chu, a thilsiamte ah kipat chun hiatthiam leh mu in a hung umtai; kuama’n suanlam a nei theilona ding un (Rom 1:20)’ ti a hi. Sam 19:1 chun, “Vante khin Pathian lopi zia a hiatsak un; vanthamjawl liantak khin a khutsuak a latsak hi,” a ti.

Lo lai ah sana (wristwatch) mu le chin, a umna ngei ah hung um dawk a hi tilo hial di la hi. Sana kisiam dan ah kipat chun a siamtu, mak deu leh mawi tak ah guanggaltu a um

ngei hi ti hedawk di la hi. Zia sana sang ah lopi zaw khawvel leh a kîmvel ah hin thilsiam a um hi. Hun bithiakdan hi sana ah um a hi pua, Pathian khutsiam - lei in nisa a veldan zil a hin a um hi. Sana chu sia taleh le hunbi chu a chia ngai, a um ngai ah um tho tho di a hi. Lei leh van kisiam mak zia leh zatchuam ziate hin a guanggaltu (designer) lopi a um hi ti hi nial gual a hi puai.

Hiatmaw zêm nei ah kizik lekthawt (encoded message) mu le chun a zêm chu a umzia hiatdaw gua'n pilvang tak ah zemak mang ah hun thawttu a um ngei hi ti he di la hi. Ziagual ah chun i taksau ah i puak velu DNA hi zemak tak ah kiguanggal a hi. Banggual lawm ah pilna mang ah i taksau DNA code hi kisiam a hi ta diam? Pathian in zia khawvel hi maktak leh mawitak ah a siam mai mai a hipua, mihing lungthim ah kumtuang thil tungsate leh a hung tungkit dingte ngaitua theina a piai (Tgt. 3:11).

Mihing lungthim a hin taksa khawvel sang ah sangzaw leh

lopi zaw a um hi ti hetna leh zia khawvel â ding ah kisingsakna - dan siam leh biakna lungthim ei nei saku a hi. Zia mun lopi zaw thi nung ah i chan theina dingun biakna leh hinkhua pha i mat theina ding ua dan siamna lungthim ei nei saku a hi. Dik leh Diklo khendantu Pathian ma'h kilang vek di i hi zia un khawvel ah i kiven theina dingun Dan i siam ua; Thutanna ma'h i din phatu leh dik ah i umtheina dingun Court siam in a um a, zia chun mi tamtak in dan diklo, thil soal i hi ngamlo khawlaw seku a hi.

Pathian chu a Thu - Bible ah hin a kipuung ta, zia chu Ama leh Ama kichian (self-evident) a hi (Gen 1:1; Exod 3:14). Min ama chanchin a zik phat leh a um ngei a hi dan leh a hing nalai a hi dan min a hetchianna ding ah thu tampi a ziklo gual in Pathian inle Ama leh Ama a um ngei a hi ti chetna (proof) thu tampi a zik puai. A ban ah Pathian kipuanna chu a Chapa Jesu Khrista hi a hi (Jn 14:6-11; Kol 2:9; Jn 1:1, 14). A til in Thu a um a, Thu chu Pathian tawh a um a, Thu chu taksa hung

chang in i lak un a hung cheng tai ti hin Pathian chu a um ti mai hilo in, i lak un a um zing hi ti ei hilu a hi.

Dawtna 5-na : *Kua'n Pathian a siam a h'em? Khawi ah kipat Pathian hung a h'em?*

Dawnhuna : Tulai nialkaltu leh atheists-te pansatna chu thil zosia hi a umsaktu (cause) ngai a hi chun Pathian chule a umsaktu a um ngai a hi tin a gen sek ui. Zia chu 'kua'n Pathian chu a siam a h'em?' tina a hi. Banghem khat (something) chu bangmalo (nothing) ah kipat hung umdawk a hi puai ti i hia vek ui. Tichun, Pathian chu banghem khat a hia, umsaktu/siamtu (cause) nei ngei di hilo a h'em? Maleh, thutawpna chu Pathian in umsaktu/siamtu a nei chun Pathian hilo a hi. Pathian chu Pathian a hilo chun Pathian umlo a hi ti a guat seku a hi.

"Kuan Pathian a siam a h'em?" ti dawtna hi dawha thuk (tricky) deu ah gingtute zawna ding ah atheist-te 'ngaidan diklo-pathian chu

khawitak hem khat ah kipat hung um' hi ding ah ngaituana diklo ah kipat ei dawt seku a hi. A dawnhuna chu 'a thudawt hi umzia neilo a hi," ti piak di a hi. A dum (blue) gimnam chu bang a h'em? ti tawh kibang a hi. A dum chu thil (things) category ah um a hi puai, ziagual a chun Pathian chule thil category ah pang a hipua, dawtna chu a diklo a hi. Pathian chu umsaktu leh siamtu neilo, Ama ah um mai a hi.

Zia chu bangti i hiat u a h'em? Bangmalo (nothing) chu bangmalo (nothing) ah kipat um a hi ti i hiau. Bangmalo mai mai a um hun a um hi a tiu ua, bangmalo chun bangmalo ma a hin sek a hi zia in thil bangma um dawk theilo di a hi. Maleh, bangmalo (nothing) ah kipat chun bang bang hem thil a hung um dawk tho tho a. Chuti a hi chun Bangmalo (nothing) gual ah hing zing (ever-existing) siamtu/umsaktu (cause) chu Pathian a hi. Pathian chu umsak neilo, thil umsaktu leh thilsiamtu a hi.

THEMBASUK PASTOR BIAL HAWN REPORT

~ Rev. Summinlian Vaiphei
i/c Sugnu Pastor Bial

Mizoram Synod (OM 8:23; Pastoral 7:5 of 8.5.2024) in Thembasuk Presbyterian Kochuam, Tangphai Provisional Synod nuai ah umta ding ah ei phal piak dungzui un, Pillangkata Presbyterian Kochuam tawh bial khat ah um ding ah Synod 3:5 in a lemsak na thu bawzui in Ni 17 February 2025 in OM member mi panga (5) Bial thak hawng ding in Lamka nusia in Shillong zuan in ka kipan dawk ui. Ni 18 February 2025 (Sepkitni) By Air leh By Road ah chiate Shillong ka tung ui. Upa Lemlian, Financial Advisor, North Eastern Council (NEC) Guest house ka um sung ua ka pansatna diu ama kiseng in eila guanggal piak ah, chun, Shillong ah ka um sung siau ah ka matchak ding un a car ei matsak hi.

- 1) Kimatchakdan:** Ni 19 February 2025 (Nilaini) ni'n Thembasuk ah Kochuam Committee tawh meeting ka nei phawt ui. Zia meeting ah chun, Bial ah puipa dingte Joint Meeting ni ah ngaitua kawm sang ah lunggel a la neisa ding in leh Bial thak kibul patna ding ah Budget um nailo a hiziak in, kochuam in tualsung sum a nei dungzui ua siam a pawimaw dan ka genkhawm ui. Zia gual ma chun a zing Ni 20 Fenruary 2025 (Ningani) in Pillangkata ah chia in Kochuam Committee tawh Bial thak ding tawh kisai ah thu pawimaw, chun, tu ah Pastor in a quarter lua lai pen Guest House ah mat di ahi tak zia ah banggual ah siamlem ding a hi em tithu genkhawmna ka nei ui.

A zing Ni 21 February 2025 (Simhaini) in Thembasuk Kochuam Hall ah Joint Meeting (Pillangkata Kochuam Committee leh Thembasuk Kochuam Committee) ka nei ua, Bial thak ah Puipa di, Bial Sunday School Committee Secretary & Member dite, Bial Kochuam Numei Pawl Office Bearers ding, Bial Khristian Khanglai Pawl Office Bearers di leh Bial Anchangham Secretary di leh Bial Auditors di guatna leh thil pawimaw dang dang ka genkhawm ui.

Chun, a zing Ni 22 February 2025 (Kiginni) Zingkal lam 10:30 a.m. ah Bial thak hawwna Rev. Vanlalchhuanga, Synod Moderator in a nei hi.

Nitaklam 1:30 p.m. ah Special Bial Kikhawmpi ka nei ngal ui. Zia hun a hin Bial Puipa di leh Committee chuam chuam ah puitu ding ah guatte, Budget estimate, Bial thak min ding Thembasuk Pastor Bial pawm na nei ngal a hi. Tangphai Synod Office ah kipat in Bial thak mat ding Minute Bu 4 leh Cash Book 2 piak a hi. Chun Bial KNP leh Bial KKP te Register Bu 2 leh Cash Book 2 chiat piak a hui. Nitak Kikhawp ah Synod Moderator, Rev. Vanlalchhuanga in Pathian thu a gen hi.

Ni 23 February 2025 (Pathianni) Zingkal 10:30 a.m. in Pastor Induction Service hun mat a hi. Pillangkata Kochuam enkawltu Rev. S. Mangminthang chu Thembasuk Bialtu Pastor ding in Rev. Kamkhotinthang Neihsial, Executive Secretary in kawidetna a nei hi.

Sunnung Kikhawp (1:30 p.m.)

Thugentu: Rev. S. Mangminthang i/c Thembasuk Pastorate

Nitak Kikhawp (6:30 p.m.)

Thugentu: Rev. C. Lalremruata, Consultant

HINNA VÂK

2) Bial Puipate

Chairman : Upa Paokhogin Singhto, *Thembasuk*
Secretaries : Upa Ginliankhup (Sr.), *Thembasuk*
Upa ST Damlian (Jr.), *Pillangkata*
Treasurers : Upa Dalkhohen (Bial sum), *Thembasuk*
Upa Genzathang (Synod sum),
Thembasuk
Chairman Elect : Rev. S. Mangminthang, *Bialtu Pastor*

3) Thubelap

Shillong ah ka um sung un kochuam mite dawisakna ka chang ua, ka giaknau ah le an ne man beklo in dawisaktute In in an ka ne sek ui. Ni 24 February 2025 (Seppatni) in Shillong nusia in Guwahati ah ka hung giak lut ua, Upa Khuplal te'n dawisakna ankuang ei sawk pi ban in ka hung giak ui. Ni 25 February zingkal 4:00 a.m. in Guwahati nusia in Leilon ka hung zuan ua, nitak lam 4:00 p.m. vel in Leilon ka tung ui. Leilon Bialtu Pastor Rev. Khuplemlal leh Bial KKP ten nitak an ei nek piu a, zingkal an Leilon Pastor Bial Puituten an ei nek pi ban un thilpiak dawí um tak tak ei piak ban un, lampi gamman na thei lak ah kipat ka bit theina ding un Bialtu Pastor in ei pui huaitu ding KKP te ei hun sawl piak sek hi.

Ni 26 February 2025 (Nilaini) zingkal lam 10:30 a.m. in Leilon ah kipan dawk in nitak lam 4:30 p.m. tuam vel in Lamka dam tak in ka hung tung kit tau. Lalpa a phai.

LAMKA SOUTH PRESBYTERY**1. Mata Pastor Bial***Pastor Andrew L.R.Khiangte*

Chairman Pi Veithiannei

Vice-Chairman Pi Thuamkim

Secretary Pi Tingphanei

Asst. Secy. Pi Neimalsawm

Treasurer Pi Sawmching

Fin. Secy. Pi Nemlalchoi

2. Panglian Pastor Bial*Pastor Th. Samuel Vaiphei*

Chairman Pi Nuamneiching

Vice-Chairman Pi Zamlianvung

Secretary Pi Vakneiniang

Asst. Secy. Pi Chinngailun

Treasurer Pi Domlhing

Fin. Secy. Pi Nengneilam

3. S. Munnuam Pastor Bial*Pastor Thianginlim*

Chairman Pi Hoithianvak

Vice-Chairman Pi Thianneilian

Secretary Pi Manneimuan

Asst. Secy. Pi Lhingneivak

Treasurer Pi Lamjonmary

Fin. Secy. Pi Rody

Lamneiphal

4. Singngat Pastor Bial*Pastor C. Kailianson*

Chairman Pi Niangpi

Vice-Chairman Pi Hoichin

Secretary Pi Chingngaihlan

Asst. Secy. Pi Thianting

Treasurer Pi Chinglam

Fin. Secy. Pi Kimneu

5. Sumtukphai Pastor Bial*Pastor S. Khaikholam*

Chairman Pi Ngaiphakim

Vice-Chairman Pi Niangngaihvung

Secretary Pi Hoikhoneng

Asst. Secy. Pi Hoithianvak

Treasurer Pi Tinkholam

Fin. Secy. Pi Tinkholam

LAMKA NORTH PRESBYTERY**1. Lamka Pastor Bial***Pastor Vanlalchhuanga*

Chairman Pi H.N. Sangkim

Vice-Chairman Pi Nemthianniang

Secretary Pi Damjohny

Asst. Secy. Pi Hoi Betty

Treasurer Pi Niangthianting

Fin. Secy. Nk. Tingmoikim

2. Kangvai Pastor Bial*Pastor Paulalsiam*

Chairman Pi Phalhoiniang

Vice-Chairman Pi Lamneingai

Secretary Pi Hoilianniang

Asst. Secy. Pi Ngailunniang

Treasurer Pi Kimbem

Fin. Secy. Pi Chawngrebek

3. S. Kawtlian Pastor Bial*Pastor Khaisonthang Vaiphei*

Chairman Pi Bemshi

Vice-Chairman Pi Ningsonting

Secretary Pi Nemhoiphal

Asst. Secy. Pi Kimberly

Treasurer Pi Neikhovak

Fin. Secy. Pi Lhingzakim

HINNA VÂK

4. Leilon Pastor Bial

Pastor Khuplemlal

Chairman Pi Nemtinhaw
Vice-Chairman Pi Themnu
Secretary Pi Nemdawikim
Asst. Secy. Pi Chinngailian
Treasurer Pi Dimnu
Fin. Secy. Pi Lamdoingai

4. Kawlhen Pastor Bial

Pastor Genlemthang Suantak

Chairman Pi R. Sangkim
Vice-Chairman Pi Lemkim
Secretary Pi Chawinu
Asst. Secy. Pi K. Jeni
Treasurer Pi Nema
Fin. Secy. Pi Lalawmpui

TANGGAM PRESBYTERY

1. Munpi Pastor Bial

Pastor S. Genlianpau

Chairman Pi Chawngmoi
Vice-Chairman Pi Mandeikim
Secretary Pi Nianglemting
Asst. Secy. Pi Kimngaimoi
Treasurer Pi Kimjemhoi
Fin. Secy. Pi Tinghoithian

5. Phaipheng Pastor Bial

Pastor Minthianboi Vaiphei

Chairman Pi Manbiakkim
Vice-Chairman Pi Phallamhawi
Secretary Pi Hoisamkim
Asst. Secy. Pi Kimsawnggak
Treasurer Pi Kimbeloved
Fin. Secy. Pi Dawingainiang

2. D. Khawzim Pastor Bial

Pastor Lamgoulia Hatlei

Chairman Pi Lalthazo
Vice-Chairman Pi Taihoi
Secretary Pi Hoilian
Asst. Secy. Pi Lamneithiem
Treasurer Pi Tingboi
Fin. Secy. Pi Kimkhaw

6. Phailianbung Pastor Bial

Pastor T. Lalgia Vaiphei

Chairman Pi Thawngghat
Vice-Chairman Pi Ngaipi
Secretary Pi Chawngngairose
Asst. Secy. Pi Lamsangkim
Treasurer Pi Niangsawngnei
Fin. Secy. Pi Kimi

3. Leijangphai Pastor Bial

Pastor Lallunglian Vaiphei

Chairman Pi Hoiniang
Vice-Chairman Pi Ngaknu
Secretary Pi Lalngaikhaw
Asst. Secy. Pi Vungneiting
Treasurer Pi Tinghoi
Fin. Secy. Pi Hatshi

LAMKA CENTRAL PRESBYTERY

1. D. Phailian Pastor Bial

Pastor S. Lama Vaiphei

Chairman Pi Lalhrietpui
Vice-Chairman Pi Lianneiting
Secretary Pi Thianhoi
Asst. Secy. Pi Lamneiham
Treasurer Pi Nemlianmawi
Fin. Secy. Pi N. Hoinu

2. Sugnu Pastor Bial

Pastor Summinlian Vaiphei

Chairman Pi Lhingkhophal
Vice-Chairman Pi Kimmmary
Secretary Pi Hoithianvak
Asst. Secy. Pi Kimhoichan
Treasurer Pi Chinhoiting
Fin. Secy. Pi Deikholam

Thembasuk Pastor Bial

Pastor S. Mangminthang

Chairman Pi Nempakhoi
Vice-Chairman Pi Hoikim
Secretary Pi Ngaihoi
Asst. Secy. Pi Kimneimawi
Treasurer Pi Thianlhing
Fin. Secy. Pi Hoilalnei

3. Dumlian Pastor Bial

Pastor H. Lamthianmuan

Chairman Pi Tingsangngak
Vice-Chairman Pi Chinhoilian
Secretary Pi Lamneilhing
Asst. Secy. Pi Kimjemmy
Treasurer Pi Lamneihhoi
Fin. Secy. Pi Chongngaibawi

Delhi Kochuam

Pastor Ph. Thianneilal Vaiphei

Chairman Nk. Th. Lianboi
Vice-Chairman Pi Ngailun
Secretary Pi Kimmawi
Asst. Secy. Pi Vickie
Treasurer Nk. Sonnu
Fin. Secy. Pi Nianglianhat

4. New Lamka Pastor Bial

Pastor Thanglianlal

Chairman Pi Chongneu
Vice-Chairman Pi Dimtinniang
Secretary Pi Hoilian
Asst. Secy. Pi Lamkim
Treasurer Pi Vanlalngak
Fin. Secy. Pi Sanghoi

Bengaluru Kochuam

Pastor Thangtinlal Suantak

Chairman Pi H. Roselyn
Vice-Chairman Pi Jemi Vaiphei
Secretary Pi Siami Chhange
Asst. Secy. Pi Rachel
Chinneithem
Treasurer Pi Olivia
Kholneithien
Fin. Secy. Pi Mary
Lheineilhing

5. Gangpimual Pastor Bial

Pastor Lalpiaklian

Chairman Pi Kimthianchawi
Vice-Chairman Pi Tingneikim
Secretary Pi Chongneitai
Asst. Secy. Pi Maryjones
Treasurer Pi Ngaimoi
Fin. Secy. Pi Chinhoisiam



Sunna

UPA S. THONGLAM (KUM 77)



Pu (L) Sumzathang leh Pi (L) Chingluan-te'n Pathian ah kipat gil ah ga malsawmna a dawnu cha giatte lak ah a neupen ding in Upa S. Thonglam hi January 1, 1948 kum in Sinzang khua'n a piang hi. Pianpi pawsal pani (2) leh numei panga (5) a nei hi.

Nu leh pa khawhe leh taima a hiziak un thiamzilna lam ngai pawimaw ah nei in lekha a la zilsak ua, Churachandpur College ah Pre-University Certificate (PUC) (tulai ah Class XII tawh equivalent) tiang a la zo hi.

October 31, 1968 in a zi Pi Vanlalchhuangi tawh a kicheng ua, chun Medical Department nuai ah Lower Division Clerk (LDC) November 15, 1971 in a sempan hi. May 15, 1984 in Upper Division Clerk (UDC) ding in promotion a mu, zia zaw ah chun August 25, 2010 in Steward ding in promotion a mu kit hi. Kum 41 vel a sepnung in February 29, 2012 in a pension hi.

Pathian ah kipat malsawmna chapa 2 leh chanu 1 a nei a, amaute ah kipat in tu 6 leh tusawn 3 a mu malam man hi.

Rev. Thangkai in Sinzang khua'n a naupan lai in baptisma a chansak hi. Upa S. Thonglam hi Pathian thu ah lunglut, lekha simpei mi ahia, a hiatte le midangte kiang ah piaksawn kâl ngakla, kochuam mite â ding ah Bible thu ah dawt tâk leh kingak theina a hi.

Nasepna lam:

Hill-Town Kochuam ah Pathian leh Kochuam mite dawisakna chang in Upa ding in November 16, 2003 in teltin ahia, EOC Khawmpi 52-Veina, New Lamka Kochuam ah December 14, 2003 in Rev. P.K. Lianmang in ordination a chansak hi.

Kochuam â ding ah mi phachuam tak a hi dungzui in Kochuam Committee ah mawpuakna chuam chuam piak in a la um a, Vice Chairman, Synod Treasurer leh a dang dangte tu'n, a vel a vel in Sunday School Superintendent in a la pang hi.

A hun nunung lam:

2018 ah kipat taksa lam ah natna hun nei in Doctorte a kietsak leh prostrate cancer a hi dan hiatdaw mudaw a hi. Imphal ah Shija Hospital ah kienkaw! in, operation le bawl a hi. Himaleh, bangma phachuam tak tak theilo in zawngkhal lam manaw tial tial maleh kikhawpna lamte ngaikhaw! in a del thei hun in a del ham ham sek hi.

Kum 2023 Lamka Pastor Bial Khawmpi in a guat dungzui in kum 2024 Lamka Pastor Bial Khawmpi, Hill-Town Kochuam ah April 28 in thupi "Thianthona" gen ding ah guat ah umna supiting in, taksa chautak himaleh thawveng tak in hun a mangthei hi. Zia chu Kochuamte tawh Pathian thu a kipaw!khawmna hun nunungpen a hi.

Taksa hatlo maleh etkawl thei dan dan ah kienkaw! zinglai chu February 8 sunnung lam in hung buai deu deu in, Pathianni, February 9, 2025 zingkal 8:00 am vel in a it leh a ngaite zosia nusia'n a na a seppiak Pathian kiang ah kumtuang ah chawldam ta ding in a lei hinkhua a zo tai.

Vuiliamna:

Inlam ah Kochuam Programme Bialtu Pastor Vanlalchhuanga in hun mang in, Biak-In a Kochuam Lapawl te'n La sa in Rev. Summinlian Vaiphei, Lamka North Presbytery Moderator in thamuanna thu gen in, Thân lam ah Bialtu Pastor Vanlalchhuanga in ît tak in a vui tai.

*Report petu,
Upa Th. Khamneithang
Secretary
Hill-Town Kochuam*